

華東卷·第八輯
玖

中國地方藝文薈萃

《中國地方藝文薈萃》編委會 編

常州师范学院内部使用

當湖文繫初編二十八卷（四）

貴州师范学院内部使用

當湖文繫初編二十八卷（四）

（清）朱壬林纂輯

據清光緒十五年（一八八九）刻本影印

當湖文繫卷十六目錄

卷第十六 記

遊青城山記

國朝

張誠

嬰山小園記

張誠

當湖書院義田後記

張誠

小西溪義冢記

張誠

水西雲隴秋譙記

張誠

游陳山記

國朝

胡昌基

張楊園先生寒風伫立圖記

國朝

徐熊飛

黃泥墘親壘記

徐熊飛

乍浦重建普福庵記

國朝 張躍麟

金臺書院配祀記

國朝 朱為弼

重脩旌功祠記

國朝 張達慶

摩雲書院碑記

國朝 楊于高

卷勺園記

國朝 許河

建始南關外新建石橋記

國朝 蔣澐

新建龍神祠記

蔣澐

遊金華北山記

國朝 顧燮臣

張城施粥廠記

國朝 張慶成

生齋記

國朝 方垵

琴臺賞雨圖記

方 垆

凝妙齋讀書記

國朝 徐士芬

洞霄宮二賢祠黃忠端公像記

國朝 時 樞

南田耕讀圖記

國朝 周如春

保石圖記 并序

國朝 朱善旂

○ 丁 卯 年 十 月 十 日 亥 時

二

丁

遊青城山記

國朝張誠

青城山去灌縣治四十里杜光庭以爲岷山第一峯按漢志岷山在蜀郡湔氐西徼外今松潘北生番界宋晁氏謂蜀以近江源者通爲岷山青城其第一峯蜀志亦云自松茂至灌皆爲岷山然則青城實在岷之東北界云乾隆戊申余留錦城學使署三月將入都思岷爲梁州巨鎮不可不一覽其勝爰作青城之遊十月二十七日曉自成都出郭百里至崇甯界翼日復行三十里渡湔江又二十里抵山下碧落觀問范處士赤城閣及其手植楠皆無存者比過建福宮夕陽已西下歷山徑旋折而上道甚窄上倚絕壁下俯窮谷行五六里乃詣常道觀宿焉觀後

負層厓上有洞曰九仙寶室之天中塑張道陵像俗呼天師洞
唐開元時飛赴寺僧奪觀爲寺元宗詔節度使張敬忠飭還道
家遷飛赴寺於山外今墨敕及敬忠奏狀碑尙存洞中余凌晨
往觀履霜縣棧行惴惴如也厓下有泉螿石爲欄曰六時水道
人云一時易一色故名六時道書稱山有流泉縣澗一日三時
灑落謂之朝泉余以朝泉詢而山中無知者茲豈是耶又何以
訛三時爲六時也晡後尋上清宮捫蘿葛越數嶺始得達宮右
二井曰鴛鴦井形六角相距五尺左有池天生石穴方廣二丈
水湛然瑩潔鑑毛髮荇藻交橫游魚涵泳余欲以杖投之道人
不可云動則輒風雨天大旱禱雨於是取水或鑄其旁曰水晶

宮豈岷爲江源而青城爲岷第一峯其猶河源之星宿海耶由宮後直上一里據山之嶺是爲丈人峯相傳黃帝封青城山爲五岳丈人因名山中人或稱九霄頂舊有累石爲室脩煉於此者是日天朗雲淨憑虛四望陽峯十八陰峯十九屹然擁列左右其極西則雪山纍纍光耀奪目是小醜金川之故地今皆已入版圖遐哉 聖天子之德化無涯也循峯而下西南行三

四里泉聲潺潺不絕有峭壁側立勒青城山三大字遒勁不知何人書又南踰嶺至石筍堂堂爲大將軍岳鍾琪家廟其右側有石筍聳而秀羣峯下繞林木鬱蔥山之最幽絕處也又轉而西南五里至朝陽洞洞視天師洞深倍之廣則三之昔人架屋

三楹於中今圯余欲遵山徑以西再訪擲筆槽而暮色蒼然道
人以險仄不可行告遂止復還常道觀越宿乃下山命駕將往
灌口道經瀕江崖壁見有環若城郭睥睨者乃悟青城命名與
吾浙赤城同一義也返以語學使黼堂錢君樾樾曰是不可以
不記遂書以告後之遊青城者

嬰山小園記

國朝張誠

環嬰山下屋數椽仍舊貫而稍改其上下曲折圍繞命曰嬰山小園爲嬰之說者儒者曰大人者不失其赤子之心道家曰靈胎曰嬰兒勿藥元詮小週天之說所由出也凡人莫不始於孩抱而長而壯而老又必至之勢是則無可奈何姑曰毋輕忘孩提云爾心性云爾邑近郊山惟案山山皆土無石就之若平陵然茲山若有過之無不及也治園於其下以園附山而山勢愈聳拔而有生色余嘗周覽天下名山其最著者岷山嶓冢峩眉凌雲西岐陳倉驪山太華太行中條嵩高少室燕山泰岱瑯琊鐘阜天台赤城會稽東西二天目茲山蓋默想少年時遊歷宇

內名勝親授匠石移撮諸山靈秀而自成一山往者李笠翁有
芥子園廣僅一畝餘林木葱蒨池臺亭館之麗有洛陽名園遺
意芥子言乎其至小也余之園猶未及芥子園之半天下園之
小者至此而極謂之天下第一小園也可

當湖書院義田後記

國朝張誠

乾隆五十四年己酉秋從弟誠以田一百六十六畝有奇作爲當湖書院義田告於邑大夫咸齋先生先生高其義旣聞於大吏未幾而弟無祿先生惜之撰義田記刊石屬余書其後余竊見先生莅任以來五年於茲百廢具舉尤孜孜於振興文教培養人材嘗以書院膏火無資懼其後之不繼間與鄉士大夫言輒扼腕躊躇而先生爲政寬仁公恕又不肯拂人之情強人以所不欲苦人以所難惟俟人好善有誠出於其心之不容已而後乃誘掖之獎勸之宜吾弟是舉之深契先生心也嗚呼吾弟少遭閔凶三年而喪吾叔父元若公七歲而先大父丹九公見

背零丁孤苦克早自樹立稍長受先人遺產慕義好施恆惴惴不克負荷是懼昔叔父嘗爲余言生平有大願將以惠吾桑梓余問何事笑而不答曰他日汝自知之今叔父之墓木拱矣余又安從一證前言然安知吾弟此舉之不與叔父之志有隱相脗合者乎抑冥冥之中佑啟吾弟使之宏此願力一踐夙志乎今吾弟又往矣然吾知吾弟自幼備聞前言實能以其好善之心仰體叔父於九原也且吾鄉自明建邑以來貴胄豪門其克世守先業者無幾獨陸氏景賢祠贍族義田數百年不改然彼止卹其宗人今吾弟更能以先人之業公諸通邑讀書敦行之士數百年後通邑讀書敦行之士猶知是田爲某之孫某之子